

# Premi da giubileum per in vair bischu

## Hotel Waldhaus Segl-Maria

DA GION NUTEGN STGIER/ANR

■ **Di da festa per las famiglias Kienberger e Dietrich da l'hotel da tschintg stailas. Quatter organisaziuns naziunalas han undrà il manaschi cun in premi da giubileum. La chasa cun ina tradiziun da passa 100 onns è il meglar exempel per in hotel che vegn manà cun bler cor ed amur.** Dapi 20 onns surdat «Icomos Suisse», la tgira naziunala da monuments, en collaboraziun cun las organisaziuns Hotellerie Suisse, Gastro Suisse e Svizra Turissem il premi hotel istoric. Cun esser l'undrientscha actuala la 20avla ediziun, han las quatter organisaziuns decedì dad er surdar ad in hotel in premi extraordinari, in premi da giubileum. Per la giuria è bainspert stà evident ch'il hotel Waldhaus a Segl-Maria ha las

megras premissas per retschaiver il premi da giubileum 2016. La chasa, situada en il guaud sur la vischnanca, è in manschi cun ina gronda tradiziun, ina da las megras adressas en Svizra ed in object cun extern ed intern ina architectura fitg singulara. Ultra da quai segnan cun las famiglias Kienberger e Dietrich ospitanas da vaglia per la direenziun da quella chasa da luxus. L'hotel Waldhaus è in bajetg cun in agen caracter ed in lieu per far vacanzas, nua ch'il mund antic ed il mund modern s'uneschan.

### In'ovra da tschintg generaziuns

Il premi da giubileum 2016 è vegnì surdà a las famiglias Kienberger e Dietrich en in rom fitg empernaivel, cun blers plects cordials e cun in vestgì musical dals trais musicists da l'hotel Waldhaus, els

che tutgan bunamain tar l'inventar dal travagl. *Gerold Kunz*, il president da la giuria ha ditg ch'il hotel Waldhaus saja betg mo mantegnì bain, mabain saja er il svilup da quel unic. A pled è er vegnì *Casimir Platzer*, dapi in onn il president da Gastro Suisse. Las famiglias Kienberger e Dietrich s'engaschan dapi decennis cun gronda passiuun per quella ovra da tschintg generaziuns. Il Waldhaus a Segl-Maria saja en tuts regards ina chasa particulara, ha accentuà l'hotelier en sia laudatio. L'hotel engiadinais saja betg passatemp e divertiment, mabain sincer e genuin, ha ditg Casimir Platzer als 80 preschents. Da reminent è l'hotel Waldhaus gia vegnì undrà il 2005 cun il premi da la tgira da monuments, lezza giada cun il premi sco hotel istoric da l'on. Gi l'onur da survegnir quel premi han ils davos 20 onns er anc quels hotels grischuns: Palazzo Salis, Soglio, Schatzalp, Tavau, Kurhaus, Bravuogn e Chesa Salis, Bever.

### Giasts fidaivels

Dapi tschintg onns èn Claudio Dietrich e Patrick Dietrich ils ospitants dal Waldhaus. Ils duas frars han surpiglià la direenziun operativa dals geniturs Maria e Felix Dietrich-Kienberger e da l'aug Urs Kienberger. La chasa cun 140 chombras e 230 letgs è dapi 50 onns èn ina situaziun favuraivla d'avair giasts fitg fidaivels, che turnan adina puspè gugent en il Waldhaus. 45% èn Svizzers, 28% derivan da la Germania ed ils auters da l'Olanda, da l'Italia, dals Stadis Unids da l'America e d'autras naziuns. L'enviern procuran 150 persunas che vegnan da 12 pajais per il bainstar dals numerus giasts che stattan fin trais emnas en l'hotel. 50% dal persunal deriva da la Svizra e fitg blers dal Portugal e da l'Italia. Ina nota dal Waldhaus a Segl-Maria è lura er ch'ina buna part dal persunal lavura gia decennis per quest manaschi.



Ilis anteriurs directurs da l'hotel Waldhaus cun lur successurs. (da san.) Claudio, Maria, Felix e Patrick Dietrich.

FOTO G.N. STGIER